



**Bosna i Hercegovina**  
**Federacija Bosne i Hercegovine**  
**Srednjobosanski kanton/Kanton Središnja Bosna**  
**Kantonalno tužilaštvo Srednjobosanskog**  
**kantona/Kantonalno tužiteljstvo Središnja Bosna**  
**Travnik**

---

**Broj: T06 0 KT 0039697 26**  
**Travnik, 30.06.2026.godine**

## **HITNO PRITVOR**

OPĆINSKOM SUDU TRAVNIK  
sudiji za prethodno saslušanje  
TRAVNIK

Na osnovu člana 45. stav 1. i 2. tačka i), člana 241. stav 1. Zakona o krivičnom postupku Federacije Bosne i Hercegovine (ZKP F BiH), podižem,

## **OPTUŽNICU**

**Potvrđena dana 01.07.2026. godine**

Protiv: **O. P.**

lišen slobode dana 13.04.2026. godine u 19,00 sati, pritvor određen po Rješenju Općinskog suda u Travniku broj: \*\*\* od 14.04.2026.godine, nalazi se u pritvoru po Rješenju Općinskog suda u Travniku broj: \*\*\* Kv od 07.05.2026 godine, koji pritvor može trajati do 13.07.2026. godine ili do nove odluke suda.

Zbog postojanja osnovane sumnje da je:

Dana 13.04.2026.godine oko 12,37 sati u mjestu Donje Putićevo, općina Travnik, upravljajući motornim vozilom marke VW Golf crne boje registarskih oznaka \*\*\* krećući se magistralnim putem M-5 iz pravca Viteza u pravcu Travnika, postupio protivno odredbama člana 173, 44 stav 1 i člana 58 stav 1 Zakona o osnovama sigurnosti prometa na cestama i na taj način ugrozio javni promet i doveo u opasnost život ljudi tako što je upravljao vozilom pod uticajem opojnih sredstava amphetamin i benzodijazepin, krećući se nedozvoljenom brzinom od 97 km/h, na mjestu gdje je saobraćajnim znakom dozvoljena brzina kretanja do 60 km/h, da bi po sustizanju pmv Opel Insignia registarskih oznaka \*\*\* kojim je upravljao A.M., koje vozilo se kretalo iz pravca Viteza u pravcu Travnika, započeo radnju preticanja vozila sa njegove desne strane, pri tom djelimično koristio i drugu površinu sa desne strane kolovoza, svjestan da takvom vožnjom može ugroziti javni saobraćaja i dovesti u opasnost živote i zdravlje ljudi, na šta je pristao, pa je prilikom preticanja vozila vozeći nedozvoljenom brzinom, desnom bočnom stranom svog vozila ostvario kontakt sa metalnom ogradom koja se nalazila pored betonske staze dok je lijevom stranom svog vozila ostvario kontakt sa desnom stranom vozila Opel Insignia na udaljenosti od 0,50 m od desne ivice kolovoza, pri čemu su desni točkovi vozila bili

na betonskoj stazi sa desne strane kolovoza, kojom betonskom stazom su se, u smjeru Travnika i benzinske pumpe Ecotok, kretali u tom trenutku pješaci oštećeni T. L. i mlđb. DŽ. I., da bi u daljem kretanju vozilom po betonskoj stazi ostvario kontakt prednjim dijelom vozila sa oštećenim pješacima na udaljenosti od 1,00 metra od desne ivice kolovoza pri čemu je pri udaru u oštećenu T. L. došlo do nabacivanja tijela na poklopac motora i prednje vjetrobransko staklo, da bi uslijed smanjenja brzine tijelo skliznulo sa vozila na podlogu sa desne bočne strane vozila vukući oštećenu za sobom do mjesta zaustavljanja vozila, dok je oštećeni mlđb. I.DŽ. uslijed udara vozilom, odbačen desno od vozila na betonsku podlogu te udario od betonski zid pored magistralne ceste, kojom prilikom je oštećena T.L. zadobila teške tjelesne povrede opasne po život u vidu prijeloma drugog vratnog kralješka, prijeloma trećeg grudnog kralješka, prijeloma lijeve potkoljenice, nagnječenje glave, razderno nagnječna rana potiljačne i sljepoočne regije desno desne uške te nosa, a mlđb. DŽ. I. teške tjelesne povrede opasne po život u vidu impresivnog prijeloma čeone kosti, nagnječine glave, epiduralnog hematoma mozga, pneumocephalus-prisustvo vazduha unutar lobanje (intrakranijalnog prostora).

Dakle, kao učesnik u prometu na putevima nije se pridržavao prometnih propisa čime je prouzrokovana teška tjelesna ozljeda dvije osobe.

čime je počinio krivično djelo Teška krivična djela protiv sigurnosti javnog prometa iz članka 336 st.1 u vezi sa člankom 332 st.1 KZ F BiH.

**Na temelju člana 77. stav 1. KZ FBiH predlažem da se osumnjičenom izrekne sigurnosna mjera zabrana upravljanja prijevoznim sredstvom B. i C kategorije.**

**Na temelju člana 202. ZKP FBiH osumnjičeni O.P. je dužan nadoknaditi troškove krivičnog postupka u visini koju odredi sud.**

### **PRIJEDLOG ZA PRODUŽENJE PRITVORA**

Na temelju odredbe člana 151. stav 1. i 242. stav 3. ZKP FBiH predlažem da se po potvrđivanju predmetne optužnice osumnjičenom O.P. produži pritvor, a iz razloga propisanih odredbom članka 146. stav 1. tač. c) .

KANTONALNA TUŽITELJICA

**Poštovani predstavnici medija, molimo Vas da prilikom prenošenja vijesti imate u vidu da osobe na koje se odnose vijesti i informacije iz Kantonalnog tužilaštva Travnik, imaju status osumnjičenih ili optuženih osoba. Podsjećamo na načelo presumpcije nevinosti koje definiše da se niko ne može smatrati krivim dok mu se krivica ne dokaže pravosnažnom presudom**